

Uunga siunnersuut: Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata allannortinnera pillugu Inatsisartut inatsisaat (Silap pissusianik pissuteqartumik ajornartorsiornerni ajunaarnersuarnullu assingusunis pisuni aallarteqqinnissamut tapiissutisisinnaaneq, akiliutigineqartartut qaffanneri kiisalu qinnuteqarnermi piffissaliussat eqqunneqarneri)

(Aalisarnermut Piniarnermullu Naalakkersuisoq)

Akissuteqaat

(Aalisarnermut Piniarnermullu Naalakkersuisoq)

Aappassaaneerera

Aalisarnermut, Piniarnermut Nunalerinermullu Ataatsimiititaliaq sukumiisumik kingunissaqartumillu isumaliutissiissuteqarneranut Naalakkersuisut sinnerlugit qutsavigaara. Naalakkersuisut ataatsimiititaliap inatsisissatut siunnersuummik suliarinninnera inatsisissatullu siunnersuutip taassuma suliarinerani annertuumik suliaqarnera nersornartippaat.

Naammagisimaarlugu malugaara siunnersuutip akuerineqarnissaa ataatsimiititaliap isumaqatigiittup inassuteqaatigaa. Taamaattorli ataatsimiititaliaq Naalakkersuisunut arlalinnik kaammattuuteqartoq. *Ataatsimiititaliaq siulliullugu kaammattuivoq, aningaasat killilerneru inatsimmi aalajangersarneqartut peerneqarnissaannik periarfissaqarnerisooq misissorneqassasoq.*

Aatsaat ajoquserneq sillimmasiinermit matussuserneqanngippat matussuserneqarsinnaanngippallu inuussutissarsiortut aallarteqqinnissamut tapiiffigineqarsinnaasut siunnersuummi ersarissumik aallaaviuvoq, inatsisinilu inissisimanerme atuuttumi ingerlatseqqinerulluni. Taamaalilluni inuussutissarsiutip immikkoortuani nalinginnaasumik atuuttoq aallaavigalugu inuussutissarsiummi pineqartumi annasaqarnissamik pinngitsoortisisinnaasumik sillimmasiineq aallaavigalugu taamaaliortoqanngippallu innuttaasunut tapiissuteqartoqarsinnaanngilaq.

Ilaatigut sillimasiisarfiit akornanni unammilleqatigiinnissamik tapiissutip ajoqusiinnginnissaa qulakkeerniarlugu aalajangersagaq ilanngunneqarpoq, tassa nammineq sillimasiinerit sillimasiisarfinnilu pineqartuni sillimatinut assigiinngitsunut aallarteqqinnissamut tapiissutit allatut periarfissaannginniassammata.

Naalakkersuisulli ingerlatsisut annikitsunik isertitaqarnertik nalilinnillu annikitsumik pigisaqarneq pissutigalugu sillimasiinissamut periarfissaqanngitsut taamaammallu pineqartoq

sillimmasiisimangikkaluartoq aallarteqqinnissamut tapiiffigineqarnissamik pisariaqartitsisarnerat akuersaarpaat. Taamatut atuutsitsinnginneq allaffissornikkut pitsaasumik ingerlatsisoqassappat inatsimmi kinaassusersiorani naleqquttumillu naliliisarnermut tunngavimmik aalajangersaanissaq pisariaqarpoq.

Aallarteqqinnissamut tapiissutit pillugit inatsimmi aningaasat killilerneqanngippata, sillimmasiisussaataitanermut atuutitinnginneq allaffissornikkut pitsaasumik ingerlatitsisinnaanngermik kinguneqassaaq, taamaalilluni sillimmasiisarfiit namminersortut unammilleqatigiinnerannut ajoqusiissaaq, tamannalu inatsisinik unioqqutitsineruvoq.

Tamassuma saniatigut inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerisut taarsigassarsinikkut aningaasalersuinissamik periarfissiisumik aningaasaateqarfimmik pilersitsinissamut periarfissat isumaliutigeqqullugit ataatsimiititaliap isumaqatigiittup Naalakkersuisut kajumissaarpaat.

Aalisarneq pillugu inatsit aalisarnermut nutaanik – aamma angallatinut aalisarluarsinnaanerusunut atortunullu nutaanut annertunerusunik aningaasaliisarnissamut pisariaqartitsinermut sinaakkusiivoq. Pisariaqartitsinermik taassuminnga nangitseqqiinissaq Naalakkersuisunut pingaartuuvoq. Naalakkersuisut taamaammat ESU-mi ineriartornermik qulaajaaneq aallartippat, tassunga ilanngullugit aningaasaliissutit, qinnuteqaatit amerlassusaat, taarsigassarsisitsisarnerit allallu siuliamut tunngassuteqartut pingaarutillit.

Qulaajaanermi tassani aalisarnermik piniarnermillu inuussutissarsiutinik siuarsaanermi inatsisinik nutarterinissamut tunngavissiisoqassaaq, taamaalilluni sinerissap qanittuani aalisarnermi ullumikkut siunissamilu pisariaqartitat inatsisikkut iliuuseqarfigineqassallutik. Qulaajaanermi tassani qanoq paasisaqartoqassanersoq apeqqutaalluni immikkoortumilu nutarterinissamik annertuumik pisariaqartitsisoqartoq paasinarsippat, tapiissuteqartarneq pillugu inatsisissap nutarterneratigut iliuusissat suut pisariaqartinneqarnersut Naalakkersuisut nalilersussavaat.

Taamatut oqaaseqarlunga siunnersuutip aappassaaneerpeqarnera Inatsisartunut suliassanngortippara.

Qujanaq.